

dźiwadła, hłowne zhromadźizny serbskich towarstwow atd. Z tym je zaso wšo to było wotstorčene, za čož je Maćičny Dom postajeny był a hłowne městno w domje maja přenajeńske městnosće. K tomu hišće je město Budyšin zapowědźilo koncesiju za hosćenc — a tak njebudže ani serbskeje hosćinskeje městnosće w domje, wězo njeporadzi-li so z dalšimi kročelemi tola skónčnje koncesiju dospěć.“ —

Kontrakt, kotryž bě twarski wubjerk z twarcom Kaupom 6. julija sčinił, a po kotremž měješe Kaup skónčnu, (5. X. wučinjenu) sumu 61 800 hr. za muleńske a česliske dźěła dóstać, žadaše, zo ma twar 15. septembra 1904 być dohotowjeny. Zarjadowanje tepjenja přepoda so Körtingej za 2918 hr. Za wuwjedženje pěskowcowych dźěłow wuzwoli so mjez pječimi poskićenkami firma Vogel a Müller w Drježdźanach, kotraž za 21 500 hr. dźěło přewza. Klempnańske dźěła přewostajichu so Röschentalerej za 1725 hr. a kryjeńske dźěła Donatej za 3259 hr. Tyšeńske dźěła dowěrichu so Schmidtej a synej, kotraž žadaštaj 7901 hr.; za jedyn poskhód pak wuwjedže mištr Jehnje, kotryž běše při přenjem dźěle jara spokojace dźěło dokonjał, blidańske dźěła. Rězbański mištr Hasenohr w Drježdźanach wudokonja rězbańske wupyšenje fasady za něhdže 4400 hr. — Hdyž běchu wšitke tele nadawki rozdźělene a jednanja w běhu jedneho lěta skónčene, móžeše na hłownej zhromadźiznje, 6. jutrownika 1904, kotrejž dr. Luzčanski přeni króc jako serbski biskop předsydowaše, muzejownik Šewčik dobru rozprawu wo twarje Doma podać. Rozprawnik spominaše na hary a prócy twarskeho wubjerk, na wažniše přeměnenja w twarskem planje (centralne tepjenje, rózkwona wěža, srjedźna fasada z wustupom, z čimž bě so twar wo něšto podróžił) a wobliču twarsku summu na 134 000 hr. Zarjadnik Cyž wozjewi, zo je dokhodow było 10 087 hr., wudawkow 4787 hr. a tohodla 5300 hr. wunoška. Předsyda wubjerk M. S. farań Kubica, wobswědči, zo je wubjerk wšo w dobrem